

歷史

第一章 本境歷代沿革

第一課

甯河寶坻分邑也 國朝雍正九年分治蓋漢泉州雍奴地周禮職方氏東北曰幽州地屬於幽史記燕世家封召公於北燕屬燕秦制天下為四十郡屬上谷郡漢置十三州泉州雍奴地屬幽州之漁陽郡後漢因之

第二課

魏屬范陽郡晉屬燕國後魏仍屬幽州太平真君七年廢泉州入雍奴北齊屬東北道行臺隋開皇時屬幽州總管大業三年改屬涿郡

第三課

唐武德初改郡為州屬幽州總管府貞觀時分十道屬河北道開元間屬幽州節度使天寶元年改為范陽節度使更名武清泉州併其內後唐屬盧龍節度使因於此地設鹽場立新倉及石晉以契丹兵滅後唐割燕雲十六州賂之地入於遼

第四課

遼於新倉置權鹽院居民聚集因分武清香河潞三縣地置香河隸南京道金大定十二年復分為寶坻縣永安三年陞置盈州以香河武清隸焉尋廢州屬中都路

第五課

元太祖時屬燕京路大興府至元間改燕京為中都路又改為大都路明改為順天府通州

國朝因之雍正九年以寶坻之梁城所為甯河縣後以四路
廳分隸順天府屬州邑屬順天府東路廳

第二章 政績

第一課 興利

後唐趙德鈞幽州人鎮蘆臺因滷地置鹽場又舟行別置
新倉儲之開渠運漕貨鹽瀛莫間資其利用是饒衍在鎮

十年雖晚節不終而置鹽場立新倉實開萬世之利

第二課

元趙鑄至元二十八年任提領關防鹽使司事集場中遺
民五七人誅茅翦棘拾瓦礫平陷阱水西有廟榜曰神母
詢所由一老能道之昔五代時鹽絕歲餘有妣語煮鹽法
繇是公私饒足鑄因禱之黎明蘆臺南十里皎如白雪者

十數頃迫而視之鹽也驅土人挾筭營收之力未竟復化
為水乃作瑞鹽歌

第三課

袁 黃字了凡吳江人明萬曆丙戌進士知寶坻縣事因
民所利而利之著勸農書水利說士佩其訓民霑其德合
邑感戴建生祠以祀之甯邑雖分仰朔恩施實與寶坻同

至今談公遺事者猶津津樂道焉

第四課

國朝伍澤榮字蔭遠祈陽人雍正丁未進士知寶坻縣事以
濟人利物為己任凡事有利於生民者無不殫力以奏效
其詳俱載寶坻志而甯邑之受其利者則於濬新河一役
為最大

第五課

沈濬字巨川貴州人康熙庚子舉人雍正十一年知縣事
政簡刑清縣自九年分治事多草創諸務待理公力董其
事凡文武官署及監倉等事度地程材以求完善而學宮
之建尤所加意立會課文親加甲乙文風由是日盛甯固
澤國乃令沿河一帶挑溝疊堰引水灌園民享其利至今
稱沈公溝

第六課

關廷牧字叢桂廣東人乾隆癸未進士三十九年知縣事
時甯邑新設縣志闕如公倡邑紳設局選修越歲告成城
內無書院即文昌祠後殿捐俸修葺講堂書舍齋厨俱備
自是文教蒸蒸日上有造於斯邑者大矣

第七課 去害

楊奇昌四川廣安州人乙酉舉人雍正九年知縣事邑之首立政者也時當治初分召募書役皆鄉氓不解任事公親為教督粗識規模曰此已足矣吏胥不必求才凡舞文枉法蒙上凌下皆若輩為之也一切治民之任每念首事者開其端後將踵而甚之故凡所施行慎之又慎

第八課

屠祖賚湖北人乾隆己未進士攝邑篆以地卑窪瀕海遇盛漲輒淹田禾為居民病前令沈濬開渠蓄水民食其利公復踵之極盡勤勞以奏成效後遇蝗災則赴村莊督令莊丁戶自行撲打絕不添役協助以為民害

第九課

喬邦哲字溥泉山西人道光二十四年來宰斯邑因地窪
下頻遭水患公慨然曰水能為患亦能為利勸民種稻造
水車式法於民惜未能竟其用而去然邑之稻田自公始
至今嘖嘖稱遺愛

第十課

毛慶麟字芷卿浙江人道光己酉拔貢咸豐己未任縣事
剛斷有識凡事之不便於民者皆力除之有鹽梟數百人
肆掠甯車沽等莊公率勇擒其首惡十五人斬於西市外
餘悉散去

第十一課

李培之字心泉河南汜水縣人光緒壬辰進士二十年宰
斯邑持己尚清廉治民務崇寬厚庚子兵燹洋人聯軍入

城迫公指領民宅公不肯洋人逼之公給領於廟宇洋人怒縛公以刃加頸挾之公辭色不變洋人奇之竟釋公邑民得無恙後公遷涿州舉邑如失怙恃士民相送者焚香遮道繼以涕零自城中至蘆臺火車站三十餘里絡繹不絕爭脫公靴以誌德焉

第十二課 聽訟

吳 欽 號文俊江蘇湖陽縣人光緒二年攝邑篆性明決勤於政事推究疑獄審斷若神莅任未久積卷一空迄今士民猶服其判斷

第十三課

管進修字琢堂江蘇江甯縣人也同治乙丑進士莅任以來勵精圖治百廢俱舉判斷尤其所長時駐防淮軍倪管

帶之弟應試北闈便道探望其兄後其兄派人送之北上途中遇匪被劫斃命所乘之馬馳入縣城嘶鳴若聲冤狀公研究得實卒獲匪犯正法一時稱青天

第十四課

吳克昌四川資州井研縣人同治甲戌進士署邑令忠信明決人民畏服時有桐城莊民人于泰淑兄弟六人骨肉自殘經十數年纏訟不已公以兄弟大義周詳反覆諄諄勸導動其良心于等感泣當堂請罪自此永不興訟友于如初

第三章 兵事

第一課

本境叛黨
他

劉守光據燕後唐莊宗遣大將周德威伐之攻拔蘆臺軍

遂進克燕城執守光

第二課

明建文四年三月鎮海衛夏百戶領軍二百名擄掠梁城
賴張諒先奮勇報效身率士卒力禦卻之六月夏百戶復
領軍擄掠諒先與戰久之敵不勝遁去

第三課

明季城西月河莊妖道聚黨煽亂兵至已遁獲一僧問之
僧曰往梁城所矣主將移兵城下勢將屠城合所震懼

第四課

掌梁城所事于君鼎盛服出迎述無反狀主將帥兵入城
覘動靜見四境帖然遂班師而回城民得無恙

第五課

明季流兵四起攻城擄掠薊州寶坻等處俱失惟本所規模尚在掌所事于公君鼎率合城千百戶吏目等官築城濬池多方守禦一日賊抵城下河水大潮一日三次賊不能進

第六課 本境戰地

咸豐八年米利堅由北塘進口互換和約十年八月英法兵自北塘登岸通州武清均被擾犯

第七課

光緒庚子聯軍闖入大沽口于家堡屯住營防戰經晝夜聯軍由塘沽陸至北塘練勇接戰久之未克居民未出境者盡遭蹂躪

第八課 險要

咸豐三年粵匪竄入直境科爾沁親王僧格林沁統察哈爾暨京營兵相機進勦屯駐營城莊南創設礮台以備不虞又迤南修補北塘礮台形勢百倍

第九課 屯駐

軍糧城屯駐馬隊五營因勦熱河教匪撤去于家堡屯駐督標五營宏字營屯駐新河一帶淮軍屯駐蘆臺南通永鎮屯駐北塘以作海防今皆撤去

第四章 耆舊

第一節 事業

第一課 孝

艾子誠邑之艾隣村人父文仲木工也偶與人鬪擊之踣誤以為死懼而逃時妻有娠兩月生子誠稍長問父所在

母泣語以故子誠隱有尋父志而未嘗言也或欲妻以女
子誠曰烏有父流離而子安處室家者固辭之

第二課

迨母以病卒營葬畢遂隻身赴遼東深山窮谷遍踪跡之
歷二十年無悔心卒於馬城山中相遇而文仲又多逋欠
滯不能行子誠遂踉蹌奔歸質田宅賣金以往奉父歸始
娶

第三課

劉弼初漢沽莊芻薪者流平居碌碌無所長父有狂症疾
大作懺懺就斃弼初聞割股可以療疾乃密以新芥封其
左股約斤許煮以進父父食之疾頓愈家人詢肉所自來
諱不洩而亦不知痛楚旬日間平復如故

第四課

諸生廉濤字松雲性謹恪早失恃父續娶逾年病大漸醫云若糞汁有穢氣當則得活否則不可為也濤嘗之無難色父歿哀毀骨立喪葬盡禮事繼母極得歡心四十餘年無稍間

第五課

崔昌明字融淑貢生性至孝事母先意承志值母病侍立嘗藥未嘗稍離手承痰血而不嫌穢母病甚衣不解帶者七日焚香告天願以身代母病竟瘳人以為孝感所致

第六課 友

崔八士字振廷祖籍邑南漢沽莊幼失怙事胞兄一士如事父析居後凡事必稟命而行姊適灤州陳孀居無著迎

養在家三十餘年無懈志一士以選拔舉人授阜城訓導
卒於官猝聞匍匐取柩歸撫養遺孤愛逾已出

第七課

邵承富字縈寰世居營城里兄弟三人伯仲俱早卒承富
其季也寡嫂在幄始終事之惟謹及兩孤成室盡以先人
所遺財產授之親所美其能讓曰予非為名也覺必若此乃
足以對若父耳且吾方壯歲能自謀生業何用此為第囑
姪等善守而已餘不與焉

第八課 睦

張綱字維三性樸實謙恭從無遽言疾色子孫循循然有
禮法五世同居親屬三十餘人或問曰翁家政何以致此
答曰無他上下皆知讓而已親族以五世同堂額其門

第九課

趙永祥字冀階性慷慨好施凡族中大事不能舉者必極力成之每歲除夕必遣人遍查村內極貧者分送錢米族人德之其敦宗睦族排難解紛至今猶稱道弗良云

第十課 媼

談友序字虎侯家頗饒裕慷慨樂施求無不應里中賴以舉火者數常十數家延師課讀子姪親戚之可造者多附學焉供飲饌備束脩賴以成就者頗衆值歲饑嘗慨然捐米以助賑邑令李之蓉屠祖賚先後給匾獎之

第十一課

崔 禕字得菴性耿介而識大體戚族中冠昏喪祭必量力資助於本支尤益加厚堂兄福舌耕為業卒時母老子

幼舉室無依公衣食資財悉與共之數十年不分畛域福
姊邵孤孀家居公並代養焉戚黨有疑難爭鬪事得公一
言比皆渙然冰釋平日經商帳簿負欠者累數千緡公病革
悉焚之其好義輕財類如此

第十二課 任

王家駿增貢生性剛正堂弟家騏幼失怙躬撫養之為之
婚娶任開州訓導時赴府送考因年老多病攜身後衣衾
以往適同寅學正韓在府病故無力棺殮駿即贈以衣衾
買棺殮之後奉委兼理學正事除應得之資仍付其家人
外復助資使輿櫬回籍知其事者咸稱義舉焉

第十三課

李卜七字景賢性真摯有寡姊二皆按月給糧供費教養

諸甥各成一藝人以是重之舉人崔一士崔桐崔佩等與相深契家極貧然朋友有急難事必竭力資助其好義誠不可及平時邑之人士多有輓章可想見聲應氣求之雅

第十四課 卹

崔崧字穎公歲貢生性直好義康熙初年南澗北澗及小淀等莊地患水人皆減值求售崧如其值契買之水退不取地亦不索值及視契內已註明故紙無用矣漢沽距北塘四十里無居人行旅苦之崧中置茶棚三間冬月捐糧施粥擇老而無依者主之來往於是路者迄今賴焉

第十五課

廉 琮字公璧性好施戚里窮困者以情告即傾囊攸助無吝色康熙四十二年水淹田禾蒙袂輯屨者絡繹於道

琮顧家所積糧自計曰盡吾力而為之於人或有濟也家人止弗聽作稠粥以給饑者自初冬至臘盡三閱月糧匱始止

第十六課

馬自誠字望宇家素裕不吝於財戚黨中待以舉火者甚衆祖遺教軍場地附近梁城西郊不下十餘頃多與貧窶者無地者以募嘗見北渡舟壞須改作所費不貲獨任之一生好善老而逾篤年九十五歲無疾而終

第十七課

李承新號似道青坨人好善樂施其村至豐臺三十里為四方之通衢地極窪下雨水大輒阻行人康熙四十年承獨力捐資築大路一條建石橋十二架往來甚便行者頌

之事聞於
尹憲旌以好善樂施匾額

第十八課

優貢生陳梅字香國北塘人性剛正不阿於俗前劄六齋
商吳有派船戶食官鹽之舉公援例鳴於官事遂寢北塘
濱海南北兩渡口向多淤泥非潮莫渡公請於官以海防
廢石修之又豐財場竈戶虧帑八百餘金衆將繫獄公惻
然代償凡鄉間義舉類如是焉

第十九課

諸生李璿字保恆性仁厚慷慨好義每至冬令必於蘆臺
碼頭側專設過河跳板一通首尾相連直達兩岸入夜則
路燈旁照遙望如列星家中蓄有藥籠貧人識與不識索
之無弗與雖珍貴難購之品無吝心亦無德色其生平周

急樂善大率類此

第二節 學問

第一課

杜封翁守禮字致中甫齟齬穎異過人受小學口誦心維
毅然謂聖賢可學而至補博士弟子員不拘拘章句學立
身飭行動必以古自持生平不譚人過嘗言天以不言自
高地以不言自厚人亦何必過於分明也里中有相爭者
每以一言而解後復有然者悔曰當無令杜公知之又嘗
言人之在世無一事不可與天知學者至今頌其言焉

第二課

崔周田字錫齡歲貢生性嗜書嘗建一樓聚古本金石刻
刻萬卷藏之終日吟嘯其中李孔昭隱於盤山物色者輒

不遇周田過之往往坐林石間相勞苦孔昭亦時下榻其
家命諸子師焉并迎孔昭母事之維謹以女妻其子此孔
昭賦謝詩所以有高堂代我供甘旨花院呼兒說史書句
也

第三課

劉敏字恭勤增廣生性嗜書積千餘卷誦讀不輟父歿
家事一付仲弟財用出入無所問迨析爨凡器物房產一
任諸弟所欲於良物無所擇生平以濟人為心精醫學好
施藥藉以全活者甚衆隱居終身溷陽高士唐壽世為之
序

第四課

談其極字用之早失怙恃賴祖嘉修教養祖年逾八旬嘗

示之曰汝輩記吾言人家惟讀書可累世相承勿替藉可
明理非為仕宦計也其極佩服此言雖貧未敢忘學嘗曰
我輩當從艱苦中覓生活不可貪逸樂因古耕自給年至
古稀好學不倦

第五課

常 越字巽峯歲貢生幼嗜讀性極孝食餼後因母病痿
動轉需人率妻趙氏晝夜蹠躩牀頭侍藥滌器形銷骨
立幾三十年母歿後不復留心舉業惟日以經書課子有
詳批四書五經古文覺斯等書年九十餘卒

第六課

高 靜字慎菴北塘人道光甲辰舉於鄉生平書無不讀
講學不執己見後學多所成就性淡泊不慕勢利著有看

詩隨錄十八卷詩話一卷周易參考一卷清華集全註試
帖典題鈔註一卷著書隨錄八卷慎菴古近體詩並詞賦文
若干卷俱待梓

第三節 名宦祠

第一課

于家堡有史公榮椿龍公汝元雙忠祠一區因咸豐八年

二公分守大沽南北礮臺英吉利兵艦直闖河口二公親
燃巨礮奮勇先登血戰多時俱殞於礮史公畧延片刻猶
復大呼殺賊合營悲憤勇氣百倍擊沈英艦多隻尸浮海
面英人竄去不敢復犯事聞

上甚悼惜命立專祠以慰忠魂且顏其額為雙忠云

第二課

蘆臺鎮東二里許有昭忠祠一所安徽李長樂字仁山謚
勤勇公弱冠從戎隸淮軍從勦髮匪屢立戰功累遷提督
團練海防駐扎蘆臺每遇饑饉舍衣施粥鄉民賴以生活
者甚衆卒後建立專祠民感恩義爭捐資以助其成

第四節 鄉賢

第一課

杜立德字純一官戶吏二部

保和殿大學士累遷刑部尚書

世祖章皇帝嘗顧左右曰爾等識此人乎此新授刑部尚書杜

立德也不私一錢不妄殺一人其為

上所褒獎如此及卒

賜謚文端崇祀鄉賢

第二課

劉人睿字穎師乾隆己卯庚辰聯捷進士掌山西道監察御史陞兵科掌印給事中守正不阿條陳時事言人所不敢言以寒士任京職恒至衣履不完後奉

命察通州倉優差也所識皆賀謂可以療貧矣而公則羸馬敝車一塵不染由是朝野有窮劉之號

王錫朋字樵慵嘉慶戊辰舉人由兵部差官擢福建汀州
鎮總兵後改壽春鎮英人陷定海公以壽春兵鎮其地敵
至力戰公衆且盡身自盪殺數十百人敵至益多公揮短
刀陷陣死

第四課

是役也敵可二萬我兵計五千戰五六日勢足待救既以

外援不至三總兵皆坐是敗死公殺敵獨多死尤烈事聞
天心震悼以提督禮

賜卹

賜祭葬謚剛節建專祠長子承泗次承瀚

賜舉人一體會試襲騎都尉兼一雲騎尉世職

第五課

廉騏元字星瞻道光丁酉經魁授安徽歙縣知縣咸豐五
年粵匪犯境公率衆登陴晝夜防堵城陷自縊於廳前桂
樹下時方二月桂花盛開識者謂公忠義所感事定蒙

恩卹贈知府銜漁亭建立專祠入直隸安徽兩省昭忠祠世
襲雲騎尉並恩騎尉

第六課

崔維允字省齋乾隆丙午舉人歷任山西鄉甯左雲縣知縣岢嵐州霍州直隸州知州政尚寬和愛民如子興利除弊績著循良嘗謂居官不講操守如婦人失節雖有他長皆無足取善聽訟鄰縣有疑獄上憲以其能輒委治之數載覆盆一時昭雪遠近頌神明焉

第八七課

劉守成字耕村乾隆丁巳進士任浙江武康縣歷調江山海甯陞湖南岳州府同知留補蘇州通判性好讀書日夜不輟尤好接引後進與人言必以古聖賢之道相勗

第八課

宰武康時惠人民整風化政績昭昭方其自武康調江山也百姓詣撫軍懇留不獲命遮道攀轅甚至泣下道旁相

送者數十里其後歷任亦咸有政聲迄今口碑猶存焉

第九課

談嘉修字廷獻雍正己酉舉人任松溪縣知縣下車伊始即以興學勸善為己任創設書院籌備束脩延師課考捐廉給膏火每課教誨諄諄以心術品行為要如塾師之誨弟子三四年間士習端而文風振焉

第十課

暇時至鄉間面諭各父老使互勸鄰里必以孝悌力田為務丁憂解任紳民餞送百餘里絡繹不絕衆建德政碑以表之服滿改補湖北大冶縣卓有政聲清儉過於儒素卸任時士民遮道攀留脫靴置諸邑門

第十一課

崔正音字義軒乾隆甲戌進士任江蘇如皋縣知縣在任
八載政令一新解篆時兩袖清風舉人留履獻衣擁舟相
餞三日不得出境歸里後邑令關公聘主書院講席生童
多賴成就其施藥餌捐義田諸善行今人猶樂道之

第十二課

崔光弼字象巖嘉慶戊辰進士任廣西容縣北流縣知縣
天姿英敏性至孝回籍終養母晚年得痰症卧牀褥十餘
載雖多指使事必躬親方其在任時善政卓著兩邑士民
咸深愛戴

第十三課

廉永倫署岐山富平兩縣知縣為政不貪財不害民不留
訟不阿勢清風峻節囊橐一空卒於官不能回籍士民歛

金三百始扶櫬歸百姓設祭相送觀者咸歎息

第十四課

廉兆綸榜名師敏號琴舫性聰穎弱冠能文精書法授職翰林院編修辦江西團練調兵斂餉動合機宜東南大局卒賴公運籌決策先後克復旋陞戶部右侍郎總督倉場罷官後怡情詩酒優游以終

第十五課

苗 樟字樹滋道光丙戌科武進士咸豐三年由山東沂州協副將奉調防堵夏邑明年春粵逆林鳳祥等北犯撲夏邑時所部二百餘人激勵迎戰敗賊前鋒追三里許賊大隊奄至兵寡無援乃赴歸德會同前廣督徐克復縣城冬赴沂州任沂地向多幅匪出入山谷間為民患公相機

勦捕一方賴以少安後以目疾乞休蒙

恩賞食半俸年八十卒

第十六課

陳鴻翊字仲鸞嘉慶戊戌科進士性聰穎好學不阿於俗
掌兵科給事中時彈劾不避權貴有鐵項御史之目及外
轉福建汀漳龍道興利除弊裨益於地方者甚衆任滿假

歸鄉中疑難事每賴公一言而解北塘船捐向由戶長公
包納公稟上憲歸官辦理多年弊累一旦掃除至今識與
不識咸稱頌之

第五章 人類

第一課

本境寶坻分邑無駐防旗民亦罕別種惟蘆臺有回民三

十餘戶餘悉漢族地勢無高山峻嶺散居平原村落風俗敦樸人民勤儉實業多務農商

第六章 戶口

第一課

本邑戶口生齒日繁至同光為最盛以濱海故地多斥鹵不能盡務農桑凡沿海諸處或稱竈戶或稱船戶而利源所在尤以海舶為大宗近自輪舟火車盛行海舶生意幾盡北塘蘆鎮居民因而失業者亦頗衆焉

第二課

庚子兵燹塘沽半為各國租地北塘及難者二千餘人其遷徙不還及癸丑年死於鼠瘟者尤多北塘土著十去二三焉他處戶口尚無增減統計合邑共三萬四千五百六

十戶二十一萬七千四百九十七口男凡十二萬九千四百四十五口女凡八萬八千零五十二口

第七章 氏族

第一課 王

王系出姬姓周靈王太子晉子宗敬為司徒時人號曰王家因以為氏舊籍江南太倉州

國初遷居邑南之蘆臺至今已十世登春榜者二人入庶常者一人登賢書者二人副車一人其功名最著者剛節公錫朋由武舉歷任壽春鎮總兵道光辛丑年殉浙江定海之難贈提督銜勅建專祠

國史有傳

第二課 崔

崔出於姜古神農後也齊丁公伋子叔乙食采於崔因氏
焉歷漢迄唐代有顯人而清河博陵兩派最著博陵一派
祖籍江蘇繼徙山西明永樂二年由洪峒縣分遷順天府
霸州及寶坻縣崔家鋪嘉靖年間由崔家鋪遷梁城所之
蘆臺萬歷年又分遷漢沽現已土著十八世子孫繁衍世
業詩書甯邑分治以來中乙科者九人甲科二人解元拔
貢副榜各一人任州縣者六人教職與丞倅十數人諸生
百數十人功名發達較遜霸州而家學綿綿猶不失高曾
之規矩云

第三課

劉出於祁帝堯之子孫生子有文在手曰劉因以為名晉
士會適秦歸晉有子留於秦遂為劉氏支派繁衍世有顯

者

國初自寶坻分遷蘆臺至今十餘世入詞林者一人成進士者三人登賢書者十餘人書香繼續在甯邑頗豔稱之

第四課 邵

邵周召公奭之後也明永樂間由浙江官留直省卜居邑南之營城莊迄今二十餘世科第蟬聯登春秋榜者十餘

人其家有祖孫父子兄弟叔姪登科匾額云

第五課 張

張出姬姓黃帝子少昊青陽氏第五子揮為弓正始制弓
矢子孫賜姓張氏祖籍浙省明季北遷寶坻之新河莊天

啟年遷北塘

國朝順治年復徙居蘆臺鎮自北遷以來至今凡十四世登

鄉榜者七人副車一人優貢一人世業詩書綿綿不絕云
第六課 苗

苗出自羊姓楚楚椒之子貴皇奔晉晉侯與之苗邑因以
為氏焉明永樂年由金陵北徙梁城所乾隆年始遷居蘆
臺鎮自隸甯邑以來迄今十四世矣舉於鄉者二人由武
進士歷任副將者一人而業儒者累世不替誠望族也

第七課 戴

戴出子姓宋戴公之孫以祖父諡為氏後人居浙江湖州
府烏程縣者自 本朝嘉慶年間始遷於邑南五十里之
小留莊今甫四世計一傳臚兩拔貢兩鄉榜矣其中傳臚
者書法尤擅絕一時

第八課 杜

杜出自祁姓帝堯裔孫劉累之後在周為唐杜氏成王滅
唐以封弟叔虞改封唐氏子孫於杜城其後遂為杜氏舊
籍隸江南鎮江府明永樂年間卜居梁城所至 國朝官
太子太師禮部尚書保和殿大學士者一人兵備道二人
主事二人知府三人知縣二人登賢書者二人州佐數人
累世簪纓可稱望族

第九課 廉

顓帝曾孫太廉之後以王父字為氏原籍江蘇後寄居山西明永樂年間由山西洪洞縣占籍寶坻梁城所之邑南廉家莊 國朝由廉家莊遷居城內累世讀書科第連綿登甲乙榜者約三十人若廉驥元之殉忠義廉師敏之蒙天眷其尤卓著者也甯邑世家大族如廉氏者蓋寥寥焉

第十課 陳

陳系出胡公滿有虞氏帝舜三十一世孫也明萬曆年間
陳過庭十五世孫守成由山陰官留京師甲申之變遷居
寶坻之蘆臺至 國朝登賢書者一人供京職為丞倅州
牧邑令教職者世不乏人迄今一百七世代有偉人世系詳
明可補國史之闕甯邑家乘如陳氏之源流可考者蓋鮮

第十一課 高

國朝高氏由山東海豐縣遷甯河之北塘始祖裕後至四世
家始大五世文光以候選州同知預千叟宴縣志有傳子
鎮至曾孫靜皆舉人授官有差靜府縣志皆有傳子棠恩
歷官知州用知縣賡恩由翰林游升太常寺少卿
弘德殿行走庚子變後假歸徙家於蘆臺鎮則辛丑四月也

北塘舊居在馬族累數十戶

第八章 宗教

第一課

邑之士民自古悉遵孔教庚子而後間有奉天主耶穌兩教者然亦千百不一二焉至喇嘛黃教紅教諸名色分縣以來未嘗有也

第九章 實業

第一課 士

邑人讀書者頗多而半屬寒士甲乙兩科亦時不乏人統計業儒者約近萬人專門課讀別無恆產者不下二千人
在昔紅樹秋燈書聲四達執經辨道文學彬彬至今私塾課程以學堂為目的體操算學逐次改良則後之視今定

勝於今之視昔云

第二課 農

治屬大河迤南多鹺鹹不毛民無可耕之地其河北河東西皆陌接阡連頗可種植田地質性肥瘠各居其半鄉隅務農者有三萬餘人然種地之家有地者甚少大概半屬富室之佃戶

第三課 工

縣風樸素工藝未興傭工者多係猶淺之業以故世家大族常不屑為約而計之有八九千人現在邑城及蘆臺各立有工藝學堂一處暫以織布開其風氣候後擬酌加他藝以浚利源亦勸百工之要務也

第四課 商

本境甚富商大賈蘆臺生意惟視河路碼頭為盛哀近因
船戶彫零舖商半皆失業現又以漢沽橋閉糧艘不通蘆
市更覺蕭索然商之子恆為商在奉省一帶經營者亦
頗不少統核本境及在他境人數約在三萬以上

格致學

第一章 毛屬

第一課 牛

牛大而有力可用以耕田用以駕車其肉與乳皆可食色分黃黑赤白純雜數種齒有上無下三歲二齒四歲四齒五歲六齒農家蓄之其用至重故以冠毛屬之首

第二課 馬

馬之毛色不一鬣鬣修長善奔走任駕負食草穀凡牽車耕田運磨俱用之性畏暑不畏寒宜浴宜曬始生曰駒

不

第三課 驢

驢有蒼黑白三種身似馬而較低長耳細尾每至午及五更初而鳴羸蓄以代羸馬之用食草菜菽麥

第四課 羸

羸之父驢也而形大於驢其母馬也而力健於馬力在腰
可用以任重惟不孳乳故異於牛馬驢

第五課 羊

羊似鹿而馴能認主不失其羣毛捲尾大者曰綿羊毛直
尾小者曰山羊春夏宜早放早收至日中汗出黏塵則生
疥癩秋冬宜晚放若食露草則腹瀉易瘠其肉味羶其子
曰羔

第六課 豬

豬豐體長鼻大耳剛鬣性善喜穢溼肉可食而多蟲恆食
之則生痰易致疾其小者曰豚

第七課 狗

狗為義獸非其主則吠之齒牙有力夜能守戶前足五爪後足四爪種分數類大者為犬猛者為獒

第八課 貓

貓陰類之獸善捕鼠身輕足捷牙尖爪利目視暗猶明睛隨時變易鼻端冷惟夏至一日暖故為陰類

第九課 鼠

鼠俗呼老鼠孕一月而生嚙物之獸也性善盜晝伏夜動每出穴時常持兩端故曰首鼠食穀粒果餅言為害之獸者鼠居一也

第十課 黃鼠狼

黃鼠狼俗名為黃鼬身狹而長首甚小齒牙銳利毛可為筆冬月取之極良今所謂狼毫者即是

第二章 羽屬

第一課 鷄

鷄有雄雌雄者司晨善鳴而有距肉冠高聳毛羽豐美雌者產卵每多者二百餘故其種蕃盛民間畜之亦養生之一物也

第二課 鴨

鴨舒鳧也其形舒緩不能高飛故曰舒鳧嘴扁而長爪指連屬性喜水邑固水鄉畜之最宜

第三課 鐵雀

鐵雀形如瓦雀而畧小黑嘴黑脰以其色類於鐵故名邑地近北山故秋冬間山雀千百為羣蔽天而來味肥美異常網戶每捕而售諸市

第四課 雁

雁候鳥也春秋兩至春至則知氣候之暖秋至則知氣候之寒故曰候鳥飛不失羣義不再偶夜宿洲渚間逐更警備土人間有以為馘者

第五課 燕

燕元鳥也身黑領紫而翅彎尾如開剪其聲細碎冬去春來銜泥巢於梁上此外復有種斑胸者為沙燕大於紫燕者為土燕形如紫燕而額黃者曰鬼燕

第六課 烏鴉

鴉與烏一物而二名烏鴉之大者小而腹下白不反哺者謂之鴉大而純黑反哺者為烏千百為羣飛集林樹其聲啞啞俗名慈鳥亦曰孝鳥

第七課 鳧

鳧水鳥也俗名野鴨狀似鴨而小徧體斑色肉肥美可食味亞於鴨邑多窪港此種最繁西南各村春秋間恆捕之

第三章 鱗屬

第一課 鯉

鯉為魚之君金色味美背三十六鱗性不相吞食有河海

二種大小不同而形相似邑之水產最美者殆無逾焉

第三課 鰈

鰈一名比目魚俗名鞋底魚生於海中細鱗青黑色一目每行則二魚相附口近腹下盛夏食之肥美異常

第三課 勒魚

勒魚俗名快魚肉中多刺頭上有骨合之為鶴喙形味鮮

美以鹽醃之久而不腐產於海中

第四課 燕魚

燕魚身扁而長尾兩叉似飛魚故名燕魚肉內有骨而無刺以鹽醃之勝於他魚

第五課 羊魚

羊魚形圓而扁尾如猪尾端有針毒能傷人得者必先去

其針味羶似羊故曰羊魚

第六課 八帶魚

八帶魚生於灘溝首如鷄卵下垂八條如帶無鱗刺肉若蚶春初鮮美但形蠢性寒間有不食者

第七課 海蛇

蛇俗名蜚形渾然凝結無口眼腹下有物如絮羣蝦附之

吐其涎沫為潮所擁蝦去而蛇留色紫有毒人取之浸以石灰礬水去其血汁則白而毒無可食

第八課 鱠殘

鱠殘即銀魚也長三四寸身圓如筋潔白如銀冬月穿冰取之金眼無紅者尤佳產於他時者或謂面條魚又名葫蘆魚

第九課 冰鮮魚

冰鮮似銀魚而小味極美惟邑特產往時頻年納貢同治二年邑令吳公詳請裁汰

第十課 黃花魚

黃花魚生於春暮夏初形扁色黃其肉有瓣首有石故又名石首魚聞雷則伏治水產者仰為歲入之大宗

第十一課 鮫魚

鮫魚形似梭首如蛇水行急速分河港海三種大小不一
惟產於港者腹潔無泥

第十二課 蝦

蝦形如蠍多足好躍背有斷脊首有長針尾有硬甲腸在
腦內子在腹外其味甘性溫入藥可以托痘瘡下乳汁河
河海港澤間皆有之乾去殼謂之米以鹽醃搗謂之醬醬
內可取油

第四章 介屬

第一課 蟹

蟹產於河其形圓八足二螯周身皆甲食物之甬與呼吸
之具皆藏甲中雄者臍尖雌者臍圓八九月間西北風起

則出腴美勝於他時漁者緯蕭承流取之或以網捕性喜
火夜以火照則畢集冬月穿冰得之則為紫蟹尤佳

第二課 蠟

蠟產於海似蟹形長而尖螯尤銳剪物如截故名春秋閒
味肥美瀕海者以底網取之亦海產亦一大宗也

第三課 蚌

蚌形如折扇大者為蜃兩殼可開可合體藏殼中不能行
動多埋伏泥中肉鮮美可食老者胎珠殼可為粉

第四課 蚶

蚶有紅白二種紅者殼上有棱形似瓦壠白者殼白細紋
味勝於紅三月得者謂之桃花蚶

第五課 煙

蟪生泥水中長二三寸殼灰色而薄身形長有兩足水落時以鈎取之性寒食之者以薑漬酒椒佐之味亞於蚶宜

第五章 蟲屬

第一課 蠶

蠶絲蟲也食而不飲飼桑柘葉老則吐絲作繭繭成而變為蛹蛹脫則化為蛾其絲有黃有白養蠶繅絲之法邑人素未講求故蠶桑之業至今未興

第二課 蝶

蝶種不一菜中青蟲當春吐絲時自縛初變為蛹繼化為蝶蟲大者蝶亦大蟲有斑花者蝶亦如之羽化五色往來於芳林花塢至秋冬則作繭草樹間

第三課 蜻蜓

蜻蜓者水蟲所化也腹細有節而長翅細薄有紋六足四翼飲露食蚋有青紅黃黑四種雨後羣飛點水為樂俗云紅黑多者則有大水

第四課 蟋蟀

蟋蟀色黝黑而光澤有翅有尾初涼則鳴性善鬪鬪則且逐且鳴俗謂之趨趨羣畜為玩以相爭勝

第五課 蝗

蝗者害苗蟲也過旱則生農家患之羣相逐捕孕于土中水浸之則化為鰕邑地卑窪旱則魚子亦多變為蝗

動物製造學

第一章

第一課 皮

皮出於本邑而裨於製造者約有數種狗可作褥羊可為裘牛可為鼓及韁鞍鞭靶諸用此雖本境所出而無能製造以裨民用者工藝之學不講也

第二課 毛

毛附於皮用與皮異氈毯鞋帽皆賴牛羊以製造其餘猪與鴨雁諸毛似無用而實有用然邑人恆不能製造或販諸他境或鬻於外洋一經購造便獲厚利倘能講求實業工藝振興則利源不至外溢實吾邑之幸也

第三課 雕翎

雕鷲鳥之大者翎色不一惟芝蔴斑者最良擇取之緝以為扇便成異樣紋式暑月扇之其風涼爽

植物學

第一章 木屬

第一課

桑有數種白桑葉大如掌鷄脚桑葉小而薄子桑先椹而後葉葉皆可飼蠶邑多荒地多植以廣其利則蠶桑之業可興奈樹桑未得其道養蠶之法未諳是以不獲蠶桑之利焉

第三課 榆

榆白粉也未放葉時先著莢如錢成串俗呼榆錢可蒸粉食又剝其外皮磨其中皮為榆麵粘滑等於膠漆鄉人多食之者

第三課 槐

槐季春五日而兔目旬日而鼠耳二旬而成葉初生嫩芽

可茹夏時開黃花秋月結實實可用以染衣木質最堅工人用以作器其耐久與榆同

第四課 楊柳

楊與柳一類而二種葉狹長枝條軟而下垂者謂之柳葉圓潤枝條短硬揚起者謂之楊柳易生挿枝則活條可編器具亦可供爨其幹之用尤大又楊有別種邑人樹之者甚稀

第二章 果屬

第一課 桃

桃之花開於春而結實於秋其花之色香與液最能誘蟲故桃內之蟲甚多光緒二十年前邑多大水桃種甚盡沒近年邑人補種者甚夥頗獲厚利

第二課 葡萄

葡萄有二種曰紫曰白折壓即生性喜水春日引蔓作架承之夏受其陰秋掇其實實熟可啖清沁心脾取其汁可釀酒

第三章 穀屬

第一課 杭稻

杭稻一類而二名也南人呼稻米北人呼杭米南人多水種色多海水鹹多旱種米有紅白二色其味甘性涼入肺可以除煩清熱去其芒而食之穀中極能養人之品也

第二課 麥

種之種類不一小麥之用較他種尤廣種宜春宜秋而皆熟成於夏初惟蕎麥耐旱易成種最晚邑人每植以給冬

儲至春即不食以其能發風動氣也

第三課 蜀黍

蜀黍今名高糧春下種夏放花仲秋成熟碾米而食能壯人氣力質可釀酒殼可飼猪邑人種之為養生一大宗也

第四課 玉蜀黍

玉蜀黍苗似蜀黍而子顆顆攢簇黃白色可蒸食碾麵食

更香美種有二春種者秋收夏種者百日内亦可成熟

第五課 穀子

穀子粟也色分黃紅白苗似稷黍而異種穗攢簇去皮俗呼為小米有三月下種五月收者亦有七八月收者刈穀宜早刈黍宜晚穀晚多零落黍早則米不成味甘性溫可以消食化積

第六課 豆

豆之種類不一其為用亦各異除日用蒸煮食外可以榨油可以漏粉磨為汁可以成腐邑土豆種頗宜故植者甚多

第四章 糸屬

第一課 芝麻

芝麻有早晚二種黑白赤三色可供食亦可作油漢張騫自西域得油麻種始種之故又名胡麻亦名脂麻

第二課 麻

麻有數種本邑所產惟白麻蔴麻初成之日漚之以水剝其皮而濯之潔白如絲而粗硬可供繩索為用最多

第三課 棉花

棉花一名吉貝元太祖由天竺得種教民種之沙地最宜
邑土亦閒能生之但不溥徧紡織之業是以不興

第五章 蔬屬

第一課 白菜

白菜古名晚菘有青白二種青者莖圓厚白者莖扁薄六
月下種七月畦栽霜後收成即所云秋末晚菘也其味甘

香蔬中勝品

第二課 芥

芥菜古名芥菘色白者上芥心味辛美扁而細者佳醃藏作
菹可以歷久其子入藥即白芥子也

第三課 韭菜

韭一歲四五剪剪而復生其根經年不死故名曰長生菜

春初嫩黃味最香美珍品也花亦可茹^作

第四課 蒜

蒜有大小二種根莖皆小瓣少味辣者為亂即小蒜也根莖皆大多瓣多味辛帶甘者為胡即大蒜也能解百毒可以通五臟達諸竅邑產最多歷年關外銷路頗廣

第五課 葱

葱有四種冬葱大管葱也漢葱木葱也葫葱回回葱也山葱蒼葱也邑人所栽惟冬葱漢葱二種而冬葱尤勝其根與鬚能作藥引可以發汗解饑以通陽氣

第六課 蘿蔔

蘿蔔者紫花菘一名萊服有紅白二種四時皆可栽惟末伏初秋為盛破甲便可供食兼可消麵積清心熱

第六章 花屬

第一課 花

邑土諸色花皆宜惟種之者罕故無名園燦爛之觀如牡丹芍藥海棠丁香迎春荷菊等皆係由他方購買用瓦盆磁缸培養以供賞玩漸有能自種者亦不過尋常一二種無甚奇麗故不俱載

第七章 草屬

第一課 蘆葦

蘆葦生潮河岸邊東坳西長雖云兩岸蘆葦生長實祇一岸以河水旋刷灣而有溜且深者不能生長坡岸得其潮潤最易叢生此亦沿河鄉民一大生產也

第二課 稗

稗即稊稗也有二種一名家稗一名野稗家稗待種而後出野稗不種而自生其味皆甘香最宜下濕之地其莖葉穗俱如粟

第三課 蒿

蒿有青蒿白蒿蓬蒿茵陳蒿數種嫩苗可茹成子可食邑西南地瘠徧地俱生暮秋子落田家掃土篩簸出粒碾面作餅人多賴之其莖供爨而已

第四課 草之入藥品者

草之屬邑產頗多無關人生日用者概從簡畧茲具性良可入藥品者差列其目如枸杞牽牛兔絲苜蓿蒼耳蒺藜車前子益母草蒲三稜等邑境皆產惜未諳炮製之法鄉民皆棄之不免遺憾

植物製造學

第一章

第一課 蓆

蓆先用木柄鐵穿將一葦而三四分之用石軸碾壓以取其柔剝其浮皮浸之以水然後調其經緯織而成蓆有三紋二紋隔紋之別沿河鄉民之一大生業也

第二課 靛

靛染衣之物也其色藍春種秋前採割漚於池中壓以重物俟水有色將渣滓撈淨之盛之以缸用木耙翻搗多次然後以石灰調之放於他池去其浮水即成矣

第三課 城

城先採割城蒿培攢成堆燃之以火收其灰而熬之淋其

清汁再熬之則成城矣邑西南地瘠諸鄉多擅此利秫稽灰如法熬淋亦可

第四課 布

邑民向無務織布業者自光緒三十年縣城創設工藝局已著有成效蘆臺鎮紳民觀感仿效開辦織紡之業大有進步三四年後延及各鄉邑土又宜種棉花實業必能振興矣

鑛物學

第一章

第一課 鹽

塘兒沽漢沽寨上營城數莊瀕居海濱地皆赤鹵當春融之日預掘土溝以待海潮漫入復於溝旁堅築曝池用八

蓬風車將潮水輓入溝入使之入池得曝曬即成鹽矣

第二課 續前

鹽成在池用木耙扒起堆積池旁隙地如高壟然名曰鹽坨以泥封覆其上待商至而批發之豐收之年約七八十萬包平收之年不過三四萬而已此竈民一大鑛產也

鑛物製造學

第一章

第一課 硝

冬日嚴寒鹽池夜經西北起風即起白城若魚鱗狀竈民撈出置於他池下鋪葦蓆用滾水澆之即成硝矣可以熟皮可以飼駱駝

第二課 滷

滷鹽澤也海水入地曬成滷以坐鹽過老反堅滑不出鹽
竈民蓄以閒池春秋以鍋熬之成塊運售四方用點豆汁
成腐其味鹹苦能毒人

第三課 鹽磚

竈民於每年夏季揀選白鹽淘洗淨潔用磨碾成細末撈
淨渣滓用木模脫成磚式培火燒之即成但民間不許販

賣每歲秋閒解送光祿寺轉進名 貢磚鹽

商務學

第一章 本境所產之物所製之品

第一課 鹽

寨上營城漢沽莊所產之鹽名梁河鹽歸長蘆商人行銷
塘沽兒沽與天津界內鄧沽所產所產之鹽名兩沽鹽亦

歸長蘆商人行銷

第二課 滷硝

滷硝銷路頗寬京津口外悉是賈人行販之場但其利不溥因出產各有定時不能常年發售耳

第三課 蘆葦

本邑蘆臺附近沿河所產之葦向歸本境織蓆之用歲不下數十萬七里海曲海里海所產蘆葦均歸天津行銷豐收之年約二十餘萬平收不過十餘萬而已

第四課 蓆

沿河鄉民編織蘆蓆除本境自費外多歸商人運往東省行銷每歲約十五六萬片

第五課 葦葉

沿河灘葦悉歸土人織席葦葉用以包裹糗子鄉民每於
夏季採之約束成把商車載賈船裝運往四方銷售獲利甚
厚

第六課 魚鰕蟹

邑地瀕海土人多以網罟為生業所獲魚鰕蟹等商賈水
陸並運京津內外俱能行銷邑人賴以生活者亦屬不少

第七課 自他境運之本境之貨物

他境貨物運入本境者大率木料紙張洋貨油糖等項由
南省運入天津烟台等處轉入本境以贍鄉民之不足他
如粗棉花粗布由山東大山及鄰邑之豐潤玉田寶坻等
處而來者亦復不少蓋邑為水陸通衢而四方
以雲集焉

地理學

第一章 疆域

第一課 廣袤坐落

東西廣一百二十一里南北袤一百三十四里在

京師東南三百八十里保定府東北六百三十里通州東南二百四十里

第二課 四境

東至張鳳莊十八里莊外三里接豐潤縣界西至西隄頭一百里以莊中石橋與天津縣分界南至塘兒沽一百二十五里莊外一里抵河河南為天津縣界北至埋珠莊八里接豐潤縣界

第三課 四隅

東南至楊家泊四十五里莊外十里接豐潤縣界西南至
于家鋪一百一十里莊外一里接天津縣界東北青坨莊
五十里接豐潤縣界西北至大月河二十里莊外一里接
寶坻縣界

第四課 與鄰縣相距遠近

東北至豐潤縣治一百一十里西南至天津縣治一百四

十里西北至寶坻縣治一百一十里

第二章 縣之若干區

第一課 里保

凡八里二十七保二百五十莊曰在城里安平里文行里
忠信里興義里崇仁里儒林里仁義里仁義里者乃乾隆
二十一年清查馬廠

恩賞官地二千餘頃為陞科徵糧而設也只有里名而無分地其各莊各保仍隸於七八

第二課 各區之方向

邑之巨鎮曰蘆臺縣正南三十里其次曰潘莊正西稍南七十里大月河縣西稍北二十里先有集廢市今廢漢沽縣南四十八里先有集市今廢惟十二月二十七二兩日尚存

赤減灘縣西南一百三里俵口縣西稍南四十里擬建集市今尚未行北塘縣正南九十里有市而無集

第三課

在城里三保五十二莊縣附近東南西南十餘里安平里二保二十莊縣北東北數里至二十餘里文行里六保四十六莊縣西南西北十餘里至三十餘里忠信里二保二

十四莊縣西西南四十里至六十餘里興義里二保三十
六莊縣南與東南西南二十餘里至四五十里崇仁里六
保四十莊縣南東南西南四十里至百餘里儒林里六保
三十莊五十里至百四五十里

第三章 古蹟

第一課 古蹟

邑八景中之北塘雙壘即兩礮臺也明嘉靖間建以備倭
者為縣之要地庚子亂為洋人拆毀而基址尚存

第二課 祠墓

後五代趙德鈞祠在蘆臺巡檢司衙門內五代梁王墓在
縣蘆臺今皆無可考縣西潘莊莊南里許有土阜一相傳為
楊七郎墓今尚存

國朝王剛節公祠在城裡李勤勇公祠在蘆臺鎮東三里許

第三課

杜文端公墓在邑東南一里有石獸碑碣

諭祭碑文

王剛節公墓在縣南蘆臺西董家莊

第三課 坊表

剛著海疆節昭千古坊在本城為王錫朋立按本縣節孝牌坊不下數十惟寨上莊李大有之妻石坊屹然獨立餘者今並不存

第四章 津渡橋梁

第一課 津渡

津者往來過水之地也渡則指其裝載之船而言是船俗

名曰擺渡有大小之分大者載車輛小者但可渡人

第二課 渡船形

渡船之形異於他船他船有艙可裝貨物有桅有篷可以乘風渡船則船面皆須鋪板而無檣帆又他船或順流或逆流渡船則亂流馬邑河津環繞多用渡船以利涉故謹誌之合邑共有大小渡船一十八隻詳之於左

第三課

東窩莊大小渡船各有一隻按東窩渡口通東三省通衢為本縣與東省往來之要路埋珠莊大渡船一隻為北出孔道邑與豐潤玉田遵化往來者所必由焉

第四課

江窪口大小渡船各一邑之西北境自天津赴豐臺之大

道庚子年洋人由此往來又此道由西北迤行西南為與寶坻分界之處道之西為寶坻道之東為甯河

第五課

蘆臺鎮大小渡船各二蘆臺為商賈輻輳之地渡船之不可須臾無者北塘渡船一以上皆薊運河北塘則河之入海處窰上莊渡船一渡直沽河河南為天津界以上各處渡

俱可通車輛

第六課

北窩渡口渡船一小楊莊南渡船一梨園莊渡船一米廠莊西渡船一馬杓沽渡船一南澗沽渡船一李家沽北船渡船一劉家莊東渡船一造甲城莊東渡船一甯車沽莊北渡船一以上各渡僅足濟行人

第七課 橋梁

濟渡船之所不足者則有橋梁或以石或以板各因其地勢而成焉本城東門外石橋一座西門外石橋一座北門外大木橋一座小橋一座西關莊北石橋一座名通濟橋莊中石橋一座名廣濟橋莊南石橋一座名張家橋莊西木橋一座名任橋家橋

第八課

東窩莊東大石橋一座南沽莊石橋二座米廠莊南石橋一座木頭窩莊西南石橋一座馮家台莊東大木橋二座青泥莊南北小石橋各一劉可莊西南大石橋一座縣軍店石橋一座

第九課

江窪口石橋一座板橋莊西大石橋一座莊西大木橋一座青坨莊南大石橋三座莊中小石橋二座苗家莊北石橋一座閻家莊南大木橋一座大月河莊中大石橋一座名永甯橋

第十課

王御史莊東石橋一座蘆臺鎮東西南大石橋各一座河北石橋一座漢沽莊北大石橋一座莊西北木橋一座鐵獅坨莊大木橋一座營城莊東大石橋一座名允毅橋

第十一課

潘莊鎮王家霧河大石橋一座始設小船以濟行人乾隆八年屠祖賚捐資創建之名曰屠公橋又莊東石橋一座南淮漁洵莊西大木橋一座造甲城莊石橋一座東堤頭

莊西大石橋一座又莊東大石橋一座西堤頭莊中大石橋一座

第十二課

北塘莊南大木橋一座莊西南石橋一座新河莊南木橋一座莊東木橋一座莊北大木橋一座塘兒沽木橋一座而蘆臺河每至冰合時生員李璿捐建過河板行人稱

按邑本水鄉橋梁甚多或昔有而今無或昔無而今有不及備載但仍舊志紀之

第五章 學堂

第一課 學堂已開學者

本城官立高等小學堂一初等小學堂一半日學堂一工藝學堂一蘆臺鎮官立高等小學堂一官立工藝學堂一

初等小學堂二回民初等小學堂一公立半日英文學社
此社在蘆臺東園西關莊初等小學堂一潘莊初等小學
堂一赤城灘初等小學堂一板橋莊初等小學堂一軍糧
城初等小學堂三北塘莊初等小學堂一青坨莊初等小
學堂一李成莊初等小學堂一漢沽莊初等小學堂一寨
上莊初等小學堂一

第六章 河泊

第一課 源委在全在本境者

曾口河出七里海東東流逕邢家坨又東十里逕任鳳莊
北又東北五里逕船沽南又里許逕南澗沽北又三里逕
北澗沽南入薊運河

第二課 源委全不在本境者

新河又曰直沽河自天津東流至車套圈入縣境自此東至大沽海口南為天津界北為本縣界就水北村莊言又東三里逕王家莊又三里逕袁家莊又六里逕李家莊又屈曲東折二里逕大小楊莊又逕鄭家莊又十里逕田家沽道又屈曲而東六里逕南劉莊又十五里逕新河莊又屈曲南流二十里逕塘兒沽又東入天津界之大沽海口

第三課 源在他境委在本境者

蘄運河因通蘄州為先時之運道故名其源縷析條分難以盡述茲就其名之著者而畧言之如左

第四課

一發源自遷安遵化諸山泉逕玉田至豐潤南入縣境者曰還鄉河又曰懷襄河

一自順義發源逕香河寶坻入縣境者曰潮白河
又自三河發源者二逕寶坻入縣境者曰鮑邱河一曰洵
河至薊州與薊運河合流

一自平谷發源逕薊州為薊運河之正派

第五課

以上諸河流皆自江窪口入縣境蓋邑處海隅地勢卑窪
受上流衆水所歸每遇山泉驟漲淋漓為災則田園盡沒
真不啻懷山襄陵之勢也俗謂邑為九河下梢者以此倘
有能明水利者除其害而興利則邑人之幸也

第六課 薊運河逕縣境之處

自縣境西北十八里之江窪口東流二里逕落波汀又東
五里逕埋珠莊又東北九里逕東淮沽又屈西五里逕幫

道沽又東五里逕青泥莊又西二里逕板橋莊又西二里
逕岳旗莊

第七課 續前

又西里許逕劉可莊又南二里逕張新莊又東里許逕田
莊頭又里許東逕小楊莊又里許逕縣城北又東北三里逕
齊家沽又東南三里逕縣城東又西南里許逕倒流窩

第七課 續前

又南折西二里逕南窩莊又西三里逕縣城西南其分支
出城西北隅南流五里入於本河者曰護城河又西二里
逕後關莊又曲東三里逕南沽莊又東折南六里逕江石
沽又折西里許逕楊家莊又西里許逕孟家莊

第八課 續前

又西南三里逕菜園又南折東三里逕高家坨又東三里逕孟舊窩又東二里逕米厰莊又逕東江石沽又里許逕塌慈莊又東北里許逕瓦房港又里許逕捷道沽又折南里許逕東朱家莊俗名朱家嘴又西南半里逕木頭窩

第九課 續前

又西南半里許逕苗家莊又西南二里許逕麥子沽又西二里逕沙窩莊又西南折流西北四里逕馬家莊又西北流一里許逕大艇莊又逕党家莊又東南八里許逕小田家莊又東三里許逕大趙莊又南折西五里逕蘆臺鎮又西六里餘逕北淵沽蘆運河之受管口河在此

第十課 續前

又折東屈南逕勾樓沽又三里逕馬杓沽又三里逕漢沽

西又西折東十餘里逕營城莊又西流折東南十五里逕塌淀莊又東六里餘逕茶棚西又西折東十餘里逕煙頭沽又西南五里逕青坨莊北又六里逕避風嘴東減河西減河注之又折東十里逕北塘新河注之一名金鐘河又東南折北七里餘逕于家鋪東又東七里餘入於海

第十一課

東減河 即王家務減水河也舊名青龍灣引河亦曰上引由寶坻大白莊東鯽魚淀又東南入縣境五里許逕潘莊東北出屠公橋下又東南五里許逕楊家莊又南注於後海穿後海東南出逕俵口莊西凡流三里許入七里又東南出逕樂善莊西又八里入曲里海今淤又東南出十二里與西減河合又二里流為甯車沽水出橋下又東南

四里注於薊運河

第十二課

西減河 即筐兒港減河也亦曰下引河自天津入縣西南境之西堤頭又里許出東堤頭橋又東流五里逕趙溫莊南又三里逕田家莊南又六里逕造甲城南入七里海凡十餘里又五里逕馮家台南復出東南流逕淮漁洶凡三十里與東減河合流六里入薊運河

第十三課

金鐘河 由天津塌河淀東十里入縣界東南流六里逕北于家堡北又三里出赤減灘橋又三里逕傅家台西又三里逕馮家台西又七里出傅家官壩橋又三十五里出甯車沽橋又十五里入薊運河

第十四課

杜瑜河 為寶坻皇莊人杜瑜挑故名由皇莊南流入縣數里至楊字莊又東南逕于京莊又西南逕躲軍店又東南逕大海北入後海

第十五課

普濟河 由寶邑東南流入縣潘莊之西北境又西南逕

西塘兒頭又南流入七里海

第十六課

黑豬河 自新河北通至金鐘河蓋溝之大者土人名為黑豬河云

第十七課

七里海 在縣治西南五十里始七里許浸瀦浸廣明世

宗時圍周二百五十有二里見明世宗實錄今則南北十餘里東西約三十里深數尺王家務筐兒港二減河是其著名者其西北三里許為後海南北六里許東西十餘里其東南十里為曲里海今涸

第七章 道路

第一課 鐵道

由豐潤縣入縣東崔莊南西行至田莊車站又西迤行而南至蘆臺車站又南稍西至漢沽車站過薊運河橋西行十餘里折而南過東西甯車站兩橋至北塘車站又南至塘兒沽車站折而西北行至新河車站迤北西行至軍糧城車站又西入天津縣界計在本境共一百七十餘里

第二課 大道

由縣城東出三里渡河至東窩莊又東十里至趙路莊又東十二里逕劉疇莊北又東十八里逕張鳳莊北入豐潤界為邑與河頭稻地往來之大道

第三課

由縣城西出三里至西關莊折而南行十里至孟家莊折西又南十四里至廉家莊又折東南十五里至高家坨又南二十二里至大艇莊又南二十七里至黨家莊西又南三十里渡河至蘆臺鎮

第四課

由蘆臺西出街折而南行四十八里至漢沽莊毗連寨上營城舊志作營城距城六十里誤又漢沽北九里曰北茶棚營城南九里曰南茶棚茶棚者因道途遙遠為行人往來休息之所故特造草房數間

第五課 續前

又南八十八里至避風嘴渡河九十里至北塘又南一百二十五里至塘兒沽再南隔河為天津縣界凡乘火車輪船者皆由此道

第六課

由縣城西出三里至西關莊又西稍南八里至任漢莊又西十八里至太子莊又西二十里至于懷莊又西四十五里逕張廣莊南又西稍北五十五里至縣軍店過杜瑜河橋又西七十里過屠公橋至潘鎮又至一百里至西堤頭入天津縣界為邑與天津往來之大道

第七課

由縣城西北出三里至張新莊又北六里至青泥莊又北

八里渡河至埋珠莊莊北為豐潤縣界此道乃由縣北與
豐玉導往來之大道

第八課

又由豐臺渡江窪口河至縣軍店歸由縣赴潘莊大道所
謂道西北為寶坻界者即此

第九課

江窪口縣西北十八里西南至大月河縣西北二十里又
西南至西棘坨縣西四十里又西南至李秀莊縣西南五
十二里又西至縣軍店縣西五十五里歸潘莊大道此道
為由豐臺往來天津之大道